



Vierte Joorgang

Fasnacht 2001



Fir in dr Nazi A e Ball ins Goal z bikoo do wurd är stärke
Drum gsehsch nit y worum dr Cecca isch fir d FDP go wärbe
Vylmeh sott doch sy Härz fir SVP und Blocher schloo
Denn au die hänn ihri Spiibäll nit in Bundesroot bikoo

Als Huusdier hett dr Hansli Ratte imme Keefig griegt
Syt dämm hett är sich daagelang mit zueluege vergniegt
Är frait sich wie die Viecher schloofe, grunze, rammle, suffe, frässe
Uff aimool sait er: «Du die kennte sich bim Big Brother go mässe»

McDonalds will am Märtplatz baue hett me letschti gheert
D Lyt im Roothuus gegeniiber und d Aawohner sinn empeert
Drby basst Politik und Fastfood zämme, goht in glyche Sagg
E groossi Hille, waichi Weggli, gar kai Biss und fad im Gschmagg

Am Radio han i gheert bi uns duet s Gsetz Kampfhind beschrängge
Denn die hänn e rilse Schnure, syge bissig, z hohl zem dängge
Die Beschrybig gheer ich – iberleeg kurz – denn erinnr' i mli
Geschter isch doch bi dr Basler SVP Versammlig gsii

Lyt wo sunscht nyt z due hänn sitze zämme – dien e Bitzi schnorre
By däm ganze kunnt fascht gar nyt use – s deent au no verworre
Isch das e Seggte-Träffe oder Kaffi-Glatsch wo nie nyt goht
Das wär jo nit so schlimm – doch s isch e Sitzig vom Verfassigsroot

Si zelle wider s Volgg drum hämmer Boscht us Bärn bikoo
Us Spargrind syg s schynts nur an d Männer gange –
das hänn mir vernoo
D Fraue sinn iber die Macho-Uusreed suur und nit begliggt
Will gwise Huusdier heb me s au perseenlig adressiert verschiggt
Wirgglig gschbaart wär gsi, d Lyt vom Theater aifach nit go zelle
Dert kennt dr Stasi-Spitzel alli Date intiärn zämmeschstelle

Sex an effendlige-n-Ort – das kunnt als Mode mächtig uff
Im Lift, im Pargghuus, in dr Sauna – iberall e Buff
In Wimbledon wurd schynts dr Boris Becker Greft go sammle
Zem Uusglych duet er denn in Abschtellkammre Models rammle
Und im Bayern-Byyro duet dr Kaiser Franz wild ummetoobe
Iber d Schrybdisch wärde dert nit numme Transfersumme gschoobe
By däm Trend macht au d Erotic-Metropole Basel mit
Do isch e 5 zue 1 im Drämmlifehlerschtand dr groossi Hit.

Die kaibe Amis sinn verlooge
Dert wird gschoobe und betrooge
Demokratie isch do kai Cent wärt
Stimme kaufsch dert uff em Märt

Oder villicht dien mir Unrächt
Und die sinn gar nit esoo schlächt
Mit ihrem IQ isch s nit wyt här
Lechli stanze isch hait schwär

Kriminal-Tango – korrupti Richter
Sex untrem Schrybdisch – BigMac – Vernichter
Busch oder Gore – sportlig und chick
Dr aint regiert jetz e Bananerepublik

Dr Putin sait: «Mir helfe zähle
By uns wisse d Leut wie wähle»
Will jede Stimm my Namme nennt
Krieg ich 110 Prozent»

Saddam Hussein und dr Ghadaffi
Sage «Amis ihr sind Schlaffi
By uns sinn Wahle niemois knapp
Wer uns nit wählt hett Rübe ab»
Horroszenarie – Terror und Schregge
Ich schwitz und ha Alpdräum – wär duet mi wegge?
I wach uff, schnuuf dure – zem Gligg hänn mir das nid
Mir wähle fair die Beschte – und use kunnt dr Sämi Schmid

Guete-n-Obe, guet Nacht
Dr Sämi Schmid isch an dr Macht
Findsch bim Yschloofe kai Rued
Losisch ihm e Bitzi zue
Wenig Schtil, fascht kai Farb, kai Profil, ruggschtändig
Är macht mied, bewegt nyt, «Freude herrscht» unbändig

Bänggle isch e glatti Sach
Mir BSG-ler sin vom Fach
Kumm doch bi uns go ynegnaisse
Mir dien Di gärn willkomme haisse

Basler Schnitzelbangg-Gsellschaft Poschtfach 4001 Basel